



Papac s dresom: Donacija za Irhada

Irhada Durakovića koji se u Londonu bori za život, svojim donacijama podržali su naši građani iz Velike Britanije. Tako su u gradu na Temzi bh. klubovi „Brent“ i „Viktorija“, te „London Sevdah hor“ i humanitarna organizacija „Our Kid's“ ukupno prikupili oko 5.500 funti. Članovi bh. asocijacije iz Birmingema sakupili su 670 funti. Nadija Cerić

iz Londona je u svojoj firmi „Ctts Solicitors Kingston“ od kolega Engleza prikupila 167 funti. Bivši reprezentativac BiH Saša Papac i član Glasgow Rengersa donirao je svoj potpisani dres, a naš mađioničar Jasmin Mešić iz Edinburga ga je stavio na humanitarnu sportsku aukciju. Po posljednjim informacijama cijena dresa dostigla je 150 funti.

7 GODINA INO IZDANJA



Dnevni avaz

Iz ugla našeg dopisnika iz Velike Britanije: Koliko smo humani

Kako je Fudo Živčo uplatio pomoć za Irhada Durakovića

Nismo se proslavili humanitarnom akcijom za teško bolesnog 23-godišnjeg Saraliju
• Sine, usta se sprdaju, a pare i papiri govore, znala bi reći moja rahmetli nana



Piše:
Namik
ALIMAŽSTOROVIĆ

Zahvaljujući „Dnevnom avazu“ i „Bosniaappealu“ iz Birmingema, naša javnost kako u domovini tako i u iseljeništvu upoznata je sa slučajem 23-godišnjeg Saralije Irhada Durakovića koji je u Londonu obolio od teške bolesti nvCJD - poznatije kao humani oblik kravljeg ludila. U više navrata pisali smo o pokretanju humanitarne akcije, njenim rezultatima, donatorima i svim drugim stvarima vezanim za ovaj slučaj.



Irhad s majkom: Borba za život

Legendarni centarhalf

Povod ovom tekstu je poziv iz Sarajeva koji sam dobio od mog druga Fuada Kumre, u raji poznatijeg kao Fudo Živčo, legendarnog centarhalfa FK Vrbanjuse, koji mi je rekao: „Pročitao sam u „Avazu“ onaj tvoj tekst o momku iz Londona što za njega skupljate pare. Majke ti, daj 10 eura za mene, ja bih uplatio, ali nemam ti ja pojma kako idu te uplate preko interneta. I još nešto, nemoj slučajno da bi me stavlj'o na neke spiskove donatora. Sramota me dati samo 10 eura, a sam znaš kakva je ovdje situacija“.

Naravno da znamo kakva je situacija u BiH, također znamo da će Fudo Živčo, kad ovo pročita, odmah, u svom stilu, „poživčaniti“, a nakon nekog vremena, kad prostudira čitav tekst, dobrodušno odobriti što smo ga ipak spomenuli.

Zašto ovo pišem? Pa, jednostavno zato što u meni dugo tinja želja da na ovakvom primjeru pokušamo napraviti presjek koliko smo mi zaista humani, a koliko pričamo da smo humani. S obzirom na to da sam ovdje u dvostrukoj ulozi, organizatora akcije i pisca ovog teksta, možda neću biti potpuno objektivan. Možda ću biti malo i ličan (nadam se da ćete mi oprostiti), ali ću svakako pokušati odgovoriti na ovo jednostavno pitanje.

Naime, „Bosniaappeal“ je molbu za pomoć Irhadu Durakoviću uputio na više od 50.000 e-mail adresa iz svog adresara, više od 30 internet-portala ga je prenijelo na svojim web-stranicama, većina štampanih i elektronskih medija u BiH i dijaspori pridružila se apelu. Sam „Dnevni avaz“ je informaciju objavio u svim svojim izdanjima, a čak dva puta na svojoj izuzetno posjećenoj web-stranici. Znači, po nekoj prosto računici, a uz to da budemo jako skromni, najmanje milion naših ljudi je bilo upoznato s pozivom za pomoć našem Irhadu.

S obzirom na obim akcije, slobodno možemo reći da su rezultati

Od Šerifa i dalje ni eura

Mladi humanitarci Arnes Pobrić i Sanjin Grčo su 16. oktobra na koncertu Šerifa Konjevića u Derbiju prikupili 875 funti. Inače, ta akcija izazvala je mnogo polemike nakon teksta koji je objavljen u „Dnevnom avazu“, gdje je iznesena istina da pjevač Šerif Konjević ima zmiju u džepu, odnosno kako je iz Derbija odnio 5.000 funti, a za Irhada nije dao ništa.

Reagirali su Šerif i njegov menadžer Hilmo Peljto i u izjavi „Avazu“ pjevač je svoj potez opravdao riječima da je bio u hotelskoj sobi i da nije znao za akciju. Na sve ovo htio je pono-

vo reagirati Muhamed Siranović iz Derbija koji je rekao da je Šerif bio na bini kada su momci objavljivali humanitarnu akciju i da s tog koncerta nije odnio 5.000 već najmanje 7.000 funti.

Nakon toga, želeći da se ova neugodna situacija okonča, menadžer Hilmo Peljto je gotovo ultimativno od „Bosniaappeala“ tražio račun na koji će Konjević uplatiti donaciju i još obećao da će održati jedan humanitarni koncert u Engleskoj za Irhada. Do dana današnjeg niti je stigla Šerifova donacija niti je Peljto organizirao humanitarni koncert.

na svjetskom nivou mršavi. Presjek akcije koja je vođena preko web-stranice „Bosniaappeala“ napravio je koordinator „Bosniaappeala“ Adis Burazerović:

- Prije svega, koristim priliku da zahvalim svima koji su donirali novac za Irhada te, naravno, svim medijima i portalima koji su podržali akciju. Posredstvom našeg računa izvršeno je 76 uplata s ukupnim iznosom od 3.400 funti. Razumljivo, najviše uplata bilo je iz Velike Britanije, ukupno 21. Iz Amerike je uplaćeno devet donacija, osam doznaka stiglo je iz BiH, a jedna iz susjedne Hrvatske. Četiri uplate došle su iz Australije i Norveške, a po tri donacije stigle su iz Njemačke, Austrije, Danske i Kanade. Po dvije uplate stigle su iz Švedske, Slovenije i Mađarske, a po jedna iz Albanije, Švicarske, Kosova, Holandije i Češke.


Prijatno smo iznenađeni doznakama iz Mađarske, Kosova, Albanije i Češke, jer znamo da tamo nema organizirane bh. dijaspore, a opet, nije nam jasno da su isti rezultat zabilježile zemlje poput Švedske, Slovenije, Švicarske i Holandije, u kojima, prema našim procjenama, živi oko 300.000 bh. građana i djeluje na desetine naših klubova - kaže Burazerović.

Ne znam šta mi je teže konstatirati, to da je iz velikih i bogatih zemalja gdje živi veliki broj naših građana, poput Njemačke, Austrije, Danske, Kanade, Australije i Norveške, stiglo ukupno 20 uplata ili to što nijedna uplata nije stigla iz Francuske, Italije, Finske, Republike Irske, Turske, Belgije, Luksemburga...

Teška situacija

Naravno, mi znamo da se u isto vrijeme u BiH i svijetu vodi na desetine sličnih akcija i da svi mi imamo nekoga koga redovno pomažemo, ali ipak ovaj rezultat je poražavajući. Svidjelo nam se to ili ne, moramo konstatirati da Irhadova teška bolest nije previše ganula naše ljude u dijaspori. Nakon ovog presjeka nisam mogao, a da se ne sjetim riječi moje rahmetli nane, koja je imala običaj reći: „Sine, usta se sprdaju, a pare i papiri govore“.

Nažalost, ovdje su pare i papiri rekli svoje, a to je da bez obzira na tešku ekonomsku i političku situaciju, u Bosni i Hercegovini humanost još živi. Sve ovo što sam napisao i nešto što sam možda nenamjerno preskočio, možete provjeriti na web-stranici „Bosniaappeala“ www.bosniaappeal.org, jer ova plemenita akcija još traje.



Kumro: Legendarni centarhalf FK Vrbanjusa



Burazerović: Mršavi rezultati